



Молебен о плененных

Благословен Бог наш... лик: Царю Небесный. Трисвятое по Отче наш: Приидите, поклонимся... (трижды)

Псалом 141:

Гласом моим ко Господу возвах, гласом моим ко Господу помолихся. Пролию пред Ним моление мое, печаль мою пред Ним возвещу, Внегда исчезати от Мене духу моему: и Ты познал еси стези моя: на пути сем, по немуже хождах, скрыша сеть мне. Смотрях одесную и возглядах, и не бе знаяй мене: погибе бегство от Мене, и несть взыскайя душу мою. Возвах к Тебе, Господи, рех: Ты еси упование мое, часть моя еси на земли живых. Вонми молению моему, яко смирихся зело: избави мя от гонящих мя, яко укрепишася паче мене. Изведи из темницы душу мою, исповедатися имени Твоему. Мене ждут праведницы, дондеже воздаси мне.

Слава, и ныне. Аллилуия (трижды).

Мирная ектения

Миром Господу помолимся!

лик: Господи, помилуй.

О свышнем мире, и спасении душ наших, Господу помолимся.

О мире всего мира, благостоянии святых Божиих церквей, и соединении всех, Господу помолимся.

О святем храме сем, и с верою, благоговением и страхом Божиим входящих вонь, Господу помолимся.

О православном епископстве Русския Зарубежняя Церкве, о господине нашем Высокопреосвященнейшем митрополите Агафангеле, первоиерарсе Русския Православная Церкве Заграницей, о господине нашем Преосвященнейшем [архиепископе, или епископе, *имярек*, егоже область], честнем пресвитерстве, во Христе диаконстве, о всем причте и людех, Господу помолимся.

О страждущей стране нашей и православных людех ея, во отечестве и разсеянии сущих и о спасении их, Господу помолимся.

О еже избавити люди своя от нашествия безбожных и еретиков, и всех брани хотящих человек, победу нам на супостаты даруя, в

нас же утвердити единомыслие, братолюбие и благочестие, Господу помолимся.

О еже низвергнути богомерзкое еретическое царство и власть, на ны движимыя, и очистити землю людей Своих от нечестия их, и православным предати, Господу помолимся.

О еже призрети вскоре на молитву смиренных, и не уничижити моления их, и услышати воздыхание окованных, в плену сущих верных рабов Своих (раба Своего, рабу Свою, *имярек*), и в них прославити имя Свое, Господу помолимся.

О еже не оставити до конца, верных рабов Своих (раба Своего, рабу Свою, *имярек*) от безбожных еретиков мучитися, но скоро свободити их, Господу помолимся.

О еже вскоре услышати глас моления нашего и от уз и темницы милостивно свободити рабов Своих (раба Своего, рабу Свою, *имярек*), Господу помолимся.

О еже не предати нас в поправление и разорение врагом и супостатом нашим, но в бегство все дерзновение их претворити, и мышцу их сокрушити, и под ноги верных Своих покорити, Господу помолимся.

О еже пременити всю скорбь и сетование наше на радость и веселие, войну же в твердый мир обратити, и Церковь нашу непребориму от всех вражиих наветов всегда сотворити, Господу помолимся.

О еже умирити Церковь Свою святую, и невредиму и непоколебиму ю соблюсти от всякаго злаго обстояния всех сопротивных апостат, Господу помолимся.

О избавитися нам от всякия скорби, гнева и нужды, Господу помолимся.

Заступи, спаси, помилуй, и сохрани нас Боже, Твоею благодатию. Пресвятую, Пречистую, Преблагословенную, славную Владычицу нашу Богородицу и Приснодеву Марию, со всеми святыми помянувшие, сами себе, и друг друга, и весь живот наш Христу Богу предадим.

Возглас: Яко Ты еси крепость и утверждение людем Своим, и Тебе подобает всякая слава честь и поклонение, Отцу и Сыну и Святому Духу, ныне и присно, и во веки веков.

Аминь.

"Бог Господь", глас 1-й.

Бог Господь и явися нам, благословен Грядый во имя Господне.

стих 1: Исповедайтеся Господеви, яко благ, яко в век милость Его.

стих 2: Обышедше обыдоша мя и именем Господним противляхся им.

стих 3: Не умру, но жив буду и повем дела Господня.

стих 4: Камень, егоже небрегоша зиждущи, сей бысть во главу угла, от Господа бысть сей и есть дивен во очесех наших.

Тропарь, глас 2-й:

Манассию от уз и горькаго заточения,/ молитв ради свободивый,
Всещедрый Боже,/ и рабы Твоя (и раба Твоего *имярек*) нами ныне
молящийся,/ от уз и заточения свободи,/ и от всякаго злаго обстояния
избави, // яко Един Человеколюбец.

Слава, и ныне. Кондак, глас 5:

Яко милосердия Источник,/ и благи Пучина, Христэ Боже,/ не презри в скорбех и бедех Тебе верою призывающих,/ но яко Щедр, помилуй,/ и от уз скоро свободи, // да поем Ти: Аллилуия.

Премудрость, прокимен, глас 7: Изведи из темницы душу мою, исповедатися имени Твоему.

Стих: Вонми молитве моей, яко смирихся зело.

Деяний Святых Апостол чтение. Вонмем.

Деяния Апостолов, зач. 29 (12.1-11).

Во дни оны, возложи Ирод царь руке озлобити некия иже от Церкви. Уби же Иакова брата Иоаннова мечем. И видев, яко годе есть иудеем, приложи яти и Петра: бяху же дние опресночнии. Егоже и ем всади в темницу, предав четверем четверицам воинов стрещи его, хотя по Пасце извести его к людем. И убо Петра стрежаху в темнице: молитва же бе прилежна бываемая от Церкви к Богу о нем. Егда же хотяше его извести Ирод, в нощи той

бе Петр спя между двема воинома, связан железнома ужема двема, стражие же пред дверьми стрежаху темницы. И се Ангел Господень предста, и свет возсия в храмине: толкнув же в ребра Петра, воздвиже его глаголя: востани вскоре. И спадоша ему ужа железная с руку. Рече же Ангел к нему: препояшися, и вступи в плесницы твоя: сотвори же тако. И глагола ему: облецыся в ризу твою, и последствуй ми. И изшед в след его идяше: и не ведаше, яко истина есть бывшее от Ангела, мняше же видение зрети. Прощедша же первую стражу и вторую, приидоста ко вратом железным, вводящим во град, яже о себе отверзошася има: И изшедше преидоша стогну едину, и абие отступи Ангел от него. И Петр быв в себе, рече: ныне вем воистину, яко посла Бог Ангела Своего, и изъят мя из руки Иродовы, и от всего чаяния людей Иудейских.

Премудрость, прости, услышим Святаго Евангелия.

Мир всем. От Иоанна Святаго Евангелия чтение.

Вонмем.

Евангелие от Иоанна, зач. 31 (8.31-36).

Рече Господь к веровавшим Ему Иудеом: аще вы пребудете во словеси Моем, воистинну ученицы Мои будете и уразумеете истину, и истина свободит вы. Отвещаша и реша Ему: семя Авраамле есмы и ни комуже работахом николиже, како Ты глаголеши, яко свободни будете? Отвеща им Иисус: аминь, аминь глаголю вам, яко всяк творяй грех раб есть греха, раб же не пребывает в дому во век, сын пребывает во век. Аще убо Сын вы свободит, воистинну свободни будете.

Слава Тебе, Господи, слава Тебе.

Сугубая ектения:

Помилуй нас, Боже по велицей милости Твоей, молимтися, услыши и помилуй.

лик: Господи, помилуй (трижды).

Милостивным Твоим оком, благоутробно призри человеколюбче Господи, на въздыхания, слезы и стенания православных рабов Твоих (*имярек*), под игом лютым заключенных, якоже призрел еси

иногда на Израиля во Египте сущаго, и скоро свободи их: сердцем сокрушенном прилежно молимтися, услыши и помилуй.

Умилосердися Господи Боже отец наших на верныя, аще и согрешившия люди Твоя, ихже праведным Твоим судом предал еси в руки врагов беззаконных мерзких отступников, и правителю нечестиво неправедному и лукавейшому паче всея земли, и не предаждь их до конца имени Твоего ради, и не разори завета Твоего, и не отстави милости Твоея от них: но изми их от лютаго мучительства, разори безбожное еретическое царство, и православных христиан свободи. Милосердному Богу нашему молимся, скоро услыши, и милостивно помилуй.

Петра от уз и темницы изведый и невредна Церкви Твоей представивый, Христе, и рабов Твоих в заточении сущих (раба Твоего в заточении суца, рабу Твою, в заточении сущую, *имярек*), яко Милосерд помилуй и от уз свободи, молимся Тебе, Всемилостивый Спасе, услыши и помилуй.

Избавляяй нища от сильна, и убога емуже несть помощника, в беде и в заточении, и во узах сущих (суца, сущую), яко Щедр милостивно свободи, прилежно молимся Тебе, скоро услыши и яко Щедр помилуй.

Еще молимся Тебе, Господу Богу нашему, о еже прияти молитвы нас недостойных рабов Твоих в сию годину испытания, пришедшую на отечество наше, и о еже явити спасение Твое.

Возглас: Услыши ны, Бóже, Спасителю наш, уповáние всех концев земли, и сущих в мóри далéче, и мѝлостив, мѝлостив бѝди, Владыко, о гресѝх нáших, и помѝлуй ны: Мѝлостив бо и Человеколюбец Бог есѝ, и Тебѝ славу возсылаем, Отцѝ, и Сѝну, и Святому Дѝху, ныне и прѝсно, и во вѝки векѝв.

И по возглашении: Со умилением паки и паки (преклоньше колена), Господу помолимся.

Молитва

Господи Иисусе Христе Боже наш, святаго апостола Твоего Петра от уз и темницы без всякаго вреда свободивый, смиренно молим Тя: приими милостивно моление наше о оставлении грехов рабов ТВОИХ (раба Твоего, рабы Твоея, *имена*) в темницу всажденных (всажденнаго, всажденную) и молитвами апостола Твоего и всех святых, яко

Человеколюбец, всесильною Твоею десницею от всякаго злаго обстояния избави и на свободу скоро изведи, да благодарно славят (славят) Тя и Безначальнаго Твоего Отца и Святаго Духа во веки веков.

Аминь.

Премудрость.

Пресвятая Богородице, спаси нас.

Честнейшую Херувим/ и славнейшую без сравнения Серафим,/ без истления Бога Слова рождшую, // сущую Богородицу Тя величаем.

Слава Тебе, Христе Боже, Упование наше, слава Тебе.

Слава, и ныне. Господи, помилуй (трижды). Благослови.

Отпуст: Христос, истинный Бог наш, молитвами Пречистыя Своея Матери, силою Честнаго и Животворящаго Креста; предстательством святых Ангелов Хранителей наших; святых славных первоверховных апостолов Петра и Павла, и прочих святых славных и всехвальных апостолов; святых славных добропобедных мучеников; святой великомученицы Анастасии Узорешительницы; святого священномученика патриарха Ермогена; святых Царственных мучеников и всех новомучеников и исповедников Церкви Руския; святых праведных Богоотец Иоакима и Анны и всех святых, помилует и спасет нас, яко благ и человеколюбец.

Аминь.